

Pierre Cohen a pres la presidéncia de Tisséo

Lo conse de Tolosa a reorganizada la governança dels transpòrts en comun de la comunitat urbana mondina.

Los elegits ecologistas tolzans an l'aire engolit l'eviccion del Verd Stéphane Coppey de la presidéncia de Tisséo, la regia de transpòrts urbans de l'aglomeracion mondina. Lo conse Pierre Cohen l'a remplaçat fa un pauc mai d'una setmana. La rason evocada oficialament per Cohen es la marrida gestion del conflicte social de decembre de 2009.

Lo 12 de genièr, a l'escasença d'una presentacion de l'organigrama nòu de Tisséo a la premsa tolzana, lo conse màger de Tolosa precisèt que los acòrds passats amb los Verds son pas cap abandonats pel biais d'aquela reorganizacion : « *Sus aquel dossièr es la presidéncia de Stéphane Coppey qu'es en causa, qu'a menat a una crispacion del dialògue social, çò diguèt Pierre Cohen, aquò a menat a una cauma d'una setmana, sens parlar de las crentas de desarraïpament qu'aviam rapòrt a aquela gestion. Ai presas mas responsabilitats davant una situacion indesmescabla e potencialment dangierosa* ». Per el, s'agissiá de tornar a una gestion apasimada après maitas annadas de gestion conflictuala.

Pel moment, l'exploitacion del malhum se fa en manejanment dirècte per la comuna. Serà fisat a un Establiment Public Industrial e Comercial (EPIC) que lo Conselh d'Administracion se tendrà a la fin del mes jos la responsabilitat de la comunitat urbana del Grand Tolosa.

Desacòrd estrategic ?

Segon los Verds, un desacòrd mai prigond sus l'estrategia dels transpòrts

seriá una primièra explicacion mai valabla.

Los verds desiravan l'esperlongament d'una de las doas linhas de metrò en servici atal coma la creacion de 35 quilomètres de tramway.

Aqueles projèctes defenduts pels ecologistas aurián contribuit a l'eleccion de Pierre Cohen en 2008 segon eles.

Pel moment la prioritat per la comunitat urbana seriá d'esperlongar la linha B del metrò. « *L'esperlongament de la linha B demòra una prioritat per asagar lo sud èst de l'aglomeracion, çò expliquèt Christian Lavigne, primièr vice-president de Tisséo, mas i a d'autres sectors, coma l'oèst e lo nòrd, qu'an tanben besonh d'èstre asagats en transpòrts en comun. S'agís d'ara enlà de se metre d'acòrd sus la « priorizacion » dels investiments e de respondre a la question essenciala : qual es que paga ?* »

Los « barons locals »

La direccion nacionala dels Verds s'es tanben exprimida sus aquel afar. « *Çò que se debana a Tolosa es fòrça grèu, çò declarèt Denis Baupin, sòci de l'executiu dels Verds e adjunt encaragat del desvolopament durable a la comuna de París, ont anam se òm desparta un elegit verd tre que met en plaça una politica ambiciosa dels transpòrts ? Èra lo primièr còp qu'aviam la presidéncia del sindicat mixte d'una ciutat bèla* ».

Gérard Onesta, cap de lista d'Euròpa Ecologia per las regionalas en Miègjorn-Pirenèus, a declarat el qu'es un « *marrít còp* » e que i a la volontat de Pierre Cohen de « *o tot contrarotlar* ». Se diguèt



Lo depaus de busses a Bassa Comba. (Fòtos LS)

sosprés pel « *silenci ensordent del PS* » sus aquel afar e se demandava cossí convèncer l'electorat ecologista de passar d'acòrds amb lo PS « *s'es tant irrespectuós amb los acòrds passats* ».

L'eviccion de Stéphane Coppey seriá pas que los darrièrs avatar de las relacions complicadas qu'an los elegits ecologistas amb los elegits socialistas.

A Lyon, Lille e Nantes, los Verds dison aver de conflictes amb los socialistas sus de « *combats de rèire-garda de la part de barons locals* » segon lo raconte que ne fa Denis Baupin. De son costat, l'ancian conse Tolosa Jean-Luc Mou-

denc manquèt pas de comentar aquela eleccion de Pierre Cohen a la presidéncia de Tisséo. « *Sus tot çò que pertòca los transpòrts en comun, pendent las doas annadas passadas, avèm agut dret a un deluvi descriçassaire sus tot çò qu'avèm fait, çò diguèt lo conselhièr municipal UMP per comunicat, mas lo poder tolosan nòu a pauc avançat sus de projèctes concrets. D'ara enlà, Tisséo es bailejada per un president que ten poders e mandats coma jamai n'a agut un sol president de Tisséo. Esperam qu'aquela poténcia politica d'un ample inedit facilitarà l'emergéncia de projèctes nòus* ». •

« Es de bassa politica politica ! »

La Setmana a reculhit lo sentiment de Stéphane Coppey, elegits verd de Balma e ancian president de Tisséo.

L'òme a passat l'estadi de l'indignacion cortesa. Ara ditz son sentiment sens s'empachar d'artificis diplomatics. Se ditz victima d'una injustícia e pensa que la decision finala de Pierre Cohen de tornar prendre en man la presidéncia de Tisséo es pas recenta.

Sus la tematica dels transpòrts de l'aglomeracion centrala de Tolosa e de

las comunas perifericas, acusa Cohen de voler tornar prendre a son compte las proposicions formuladas pendent sa pròpria presidéncia sens las voler vertadièrament concretizar.

A l'ora d'ara, la comunitat urbana del Grand Tolosa rebala un deute d'un miliard d'euros consecutiu a la construccion de la primièra linha de

metrò sens cap de participacion de las comunas perifericas. L'esperlongament de la linha B cap a Labèja o la bastison de linhas de tramway per Tolosa *intra muros* constituïrà un còst suplementari important que Cohen sembla pas tant dispausat qu'aquò a assumir, segon los tèrmis de Stéphane Coppey. Rapòrt a la cauma a Tisséo, qu'es la rason principa-

la de son eviccion, l'elegit verd de Balma rapèla que s'agís de reivindicacions ancianas que serián pas estadas escotadas per la presidéncia qu'a davantajat la seuna. Considera d'aver manejat aquel afar mercés a un equilibri del rapòrt de las fòrças trobat entre la direccion e los sindicats. Per Coppey, aquel balanç es estat romput per de

« manòbras politicas » del conse de Tolosa pel biais dels sindicats. Aquela cauma, la direccion l'auriá poguda reglar en tres jorns mas sa fin seriá estada retardada per l'interposicion de Pierre Cohen. Per Stéphane Coppey tot se ten ; Pierre Cohen auriá volgut tornar prendre la presidéncia de Tisséo tre son eleccion a la comuna de Tolosa.

La Setmana — Segon vos, Pierre Cohen voliá presidir Tisséo tre la debuta de son mandat ?

Stéphane Coppey — Tre l'endeman [de son eleccion], P. Cohen a pas volgut respectar los acòrds signats. Los Verds devián obtenir doas vice-presidéncias a la comunitat urbana del Gran Tolosa, nos n'acordèt pas qu'una après de convèrsas longas. Estimava qu'amb la presidéncia de Tisséo, aviá ja pro balhat. L'exprimissí ja a aquel moment. Puèi venguèt la question de la comission dels transpòrts del Gran Tolosa, la de la SMAT [NDR : Societat del Mètro de l'Aglomeracion Tolzana], puèi la de la direccion generala dels transpòrts qu'essagèt de destabilizar de faison indirècta, etc. Tot aquò per n'arribar finfinala a aquel acte escandalós qu'es mon eviccion e la de ma collèga verda Michèle Bleuse [NDR : conselhièra municipala verda de Tolosa] de la representacion al dintre de Tisséo. Tot aquò es pas que de bassa politica politicaiana a la quala ven de se liurar lo sènher Cohen.

LS — Riscam de veire los elegits ecologistas partir dins l'oposicion o ne sèm pas encara a aquel punt ?

SC — Espiem l'escòre de las listas ecologistas a las eleccions europèas a Tolosa. I a agut 22 % per Euròpa Ecolo-

gia e sonque 17 % pel Partit Socialista. Alavetz, qual deuriá passar dins l'oposicion ? Son los que son pas d'acòrdi amb la politica menada pels ecologistas que deurián passar dins l'oposicion ! (rires) A l'ora d'ara i a una rompedura per En Cohen dels acòrds politics. I aurà benlèu una represa pels verds tolosans d'una autonomia d'apreciacion e de vòte sus cada subjècte a l'òrdre del jorn. Mos collègas an votat lo budgècte de Tolosa e l'avèm votat al Gran Tolosa pr'amor avèm estimat que sos axes prioritariis nos convenián. Aquò dit i a de subjèctes que van tornar sortir dins los meses que venon, a l'imatge del dossièr dels transpòrts, ont i aurà de diferéncias plan mai seriosas. Balharàn çò que balharàn en tèrmis de majoritats a Tolosa e dins la comunitat urbana.

LS — Serà pas una oposicion oficiala mas una oposicion dins los faits ?

SC — Sus un cèrt nombre de subjèctes, òc, se l'axe de las proposicions dels Verds es pas seguit. Dins los faits, los Verds representan l'expression majoritària dels tolosans.

LS — Avètz agut lo sosten de Denis Baupin, de Gérard Onesta... I a d'autres formacions d'esquèrra que vos an sostengut ?

SC — Ai agut un sosten complet dels Verds e mai generalament d'Euròpa Ecologia. I a agut una actitud mai critica del Partit d'Esquèrra en la persona de Jean-Christophe Sellin que s'exprimiguèt en lo Conselh de comunitat del Gran Tolosa. Es un dels sols a s'èstre demarcat d'aquela actitud d'ostracisme de la part del Partit Socialista, del PRG e dels comunistas. Veirem plan çò que balharà



Verds e socialistas son en desacòrd sus l'extension de las linhas de metrò.

del temps de las regionalas. I aguèt qualques elegits de dreita que se son demarcats tanben. D'unes son anats dins lo sens de P. Cohen, d'autres an considerat qu'aquelas practicas politicas son pas acceptablas emai sián comparablas (per d'unes) a las de fa qualques annadas.

LS — Assistissèm a un divòrci generalizat entre socialistas e ecologistas, vila per vila ?

SC — En Cohen e sos representants essajan de far creire que i a pas de « clash », que i a pas de rompedura de l'acòrd politic mentre qu'en son los artesans. Vos pòdi sonque repetir que serà pel biais d'un contracte de governança entre comuna de Tolosa e comunitat urbana del Grand Tolosa que se

jutjarà l'ample de la rompedura que i a entre los verds, Euròpa Ecologia e los socialistas, comunistas e radicals. Veirem plan çò que se debanarà per las regionalas.

De qué val un acòrd politic signat amb lo Partit Socialista, en particular s'es trepejat mens de dos ans après sa signatura ? Es una de las interpellacions que Gérard Onesta a adreçadas a Martin Malvy e a Martine Aubry. Lor voliá demandar çò que caliá creire dins un acòrd politic passat amb eles, se pòt èstre credible. Avèm pas de resposta oficiala de Martin Malvy pel moment. Aquò pausa la question de çò que se debanarà entre los dos tornos de las regionalas pel mes de març venent. •

Entrevista Clamenç Pech

Claudi Alranc interròga los candidats

Dins una letra dubèrta als candidats a las eleccions regionalas, lo dramaturge Claudi Alranc entend plan ausir lor posicion sus de questions que considèra essencials per aver « lo dret e los mejans de crear ».

Pausa primèr la question de la part dels crèdits e lor destinacion. Se demanda quina part partís a París, quina part tòrna als creators « implantats »... e sus aquela part autrejada als creators implantats quina part tòrna als creators « en lenga [dita] regionala ». Dins un contèxte de « mondializacion salvatja e de centralisme d'Estat exagerit », demanda als elegits quina idèa an sus aquel sicut per garantir « non pas un proteccionisme local e regional » mas per garantir « un equilibri juste ». Parla del partage del « mercat cultural » entre public e privat, en tot evocar un « artesanat artistic e cultural » coma una mena de tresena via per default. Per el, los creators son daissats de caire per un sector mercand


que priva de paraula los e las « qu'an pas l'argent nimai lo tast per s'impausar sus aquel tipe de mercat ». Del costat del public, constata que se « nacionaliza e ierarquiza la paraula al profièit d'una casta d'anoblits que sonque la tecnocracia d'Estat e lo notabilisme provincial causís ».

Per Alranc, aquel tresen sector « artesanal » es lo que « desbartassa a tots los nivèls de la societat, entpren d'experiéncias nòvas, pren totas las riscas e recampa pas que l'abséncia, lo silenci o lo mesprètz dels poders en plaça ». Se demanda alavetz çò que comptan far los elegits per que l'esquema cultural local, regional, nacional e mondial siá pas una « escala ierarquica discriminatòria » e que responda a d'escambis fòrça mai subtils e « necessàriament recipròcas ».

Reclama finfinala que la politica culturala siá pas la mendra de las preocupacions. Vei pas de contracte social

possible sens maridar « l'ecologic e lo cultural ». Espèra sustot que la cultura quite d'èstre vista coma « una veirina artistica del paréisser », que la cultura dona segon el « los punts de referéncias indispensables a una ciutadenetat locala e universal, liberada de las alienacions e dels traumatismes de l'istòria e del present ».

Dins aquela missiva ne profièita tanben per s'adreçar als occitanistas. Dins lor « esfòrc coratjós d'arribar », veirián pas totjorn que reproduisson « l'infedacion a la lei politica o a la lei del mercat » pel professionalisme ; o encara « lo manten dins un ganha-pichòt que se dona de ganhar pas que per lo contentament d'un public de manten » per l'associacionisme. « Anem òc un còp cada tres ans, sufirà pas pus per sortir d'aquel copa-cap perilhós, çò ditz, tornamai lo temps ven d'una refundacion de çò que sèm, non pas dins l'amira mistralenca del desrevelh europèu de las nacionalitats, non



Claudi Alranc. (Marc Ginot)

pas dins l'amira occitanista d'una revolucion regionalista... Ne sèm a la mondializacion e a la crebadura de la Tèrra sens grand mejan per dire e transmetre de qué sèm... E pasmens sèm ! Alara cossí anar al monde sens se negar ? Dura question que seriá ben crudèla s'èra pas la question del monde tot ». •